



SERAHKAN ... Masidi (tengah), Sukarti (kiri) dan D Kamarudin bergambar kenangan ketika Penyerahan Bantuan Khas Kewangan Pelajar IPT anak-anak Sabah di UMS.



KENANGAN ... Masidi (tengah) merakamkan gambar kenangan bersama para jemputan dan pelajar selepas program.

Lebih 4,000 pelajar menuntut di IPT/S di Sabah terima bantuan khas 'one off' RM950

NSR 26.4.2018 3
OLEH MARRYAN RAZAN

KOTA KINABALU: Seramai 4,184 pelajar dari 18 buah Institut Pengajian Tinggi Awam dan Swasta (IPT/S) di Sabah menerima bantuan khas 'one off' RM950 melibatkan jumlah keseluruhan sebanyak RM3,974,800.

Setiusaha Kerajaan Negeri Tan Sri Sukarti Wakiman berkata, selain itu, RM1,025,200 lagi diagihkan kepada seramai 1,079 pelajar Sabah yang menuntut di IPT Sarawak dan Semenanjung Malaysia.

Beliau berkata, kerajaan negeri menerima 6,818 permohonan daripada 108 IPT seluruh Malaysia dan 5,263 pelajar berjaya memenuhi kriteria untuk menerima bantuan khas itu.

"Ketua Menteri Tan Sri Musa Aman mengumumkan peruntukan sebanyak RM5 juta pada Bajet Negeri 2018 di bawah Peruntukan Khas Bajet.

"Peruntukan ini diagih-agihkan kepada anak-anak Sabah yang sedang belajar di IPT seluruh Malaysia. Inisiatif ini bertujuan meringankan bebanan kewangan para pelajar di samping memberi galakan serta motivasi kepada mereka untuk cemerlang dalam akademik," katanya.

Beliau berkata demikian ketika berucap pada majlis Penyerahan Bantuan Khas Kewangan Pelajar IPT Anak-Anak Sabah, di Kompleks Dewan Kuliah Pusat Ke-2, Universiti Malaysia Sabah (UMS), di sini, kelmarin.

Majlis itu disempurnakan oleh Menteri Pelancongan, Kebudayaan dan Alam Sekitar

Datuk Masidi Manjun mewakili Ketua Menteri Tan Sri Musa Haji Aman.

Sukarti berkata, kerajaan negeri sentiasa mengutamakan pembangunan modal insan yang berkualiti bagi memastikan anak-anak Sabah mempunyai ruang untuk memperkasa keupayaan dan kebolehan, seiring dengan ilmu pengetahuan dan kemahiran yang dimiliki.

"Kerajaan negeri berbesar hati memberikan bantuan khas ini sebagai lambang keprihatinan kerajaan terhadap kebajikan dan kesejahteraan anak-anak Sabah yang merupakan pewaris kerajaan negeri Sabah," katanya.

Sementara itu Naib Canselor UMS Prof.Datuk Dr.D Kamarudin D Mudin berkata, bantuan khas kewangan itu membuktikan kerajaan negeri amat prihatin terhadap kepentingan pendidikan dan kebajikan anak-anak Sabah yang sedang menuntut di IPTA/S.

Beliau turut merakamkan penghargaan kepada kerajaan negeri atas bantuan kewangan itu untuk para pelajar di 17 IPTA dan IPTS

seluruh negara.

"Saya percaya bantuan ini sangat memberi manfaat dan sekaligus memberi suntikan semangat serta dorongan kepada para pelajar untuk terus maju ke hadapan dan cemerlang dalam bidang masing-masing," katanya.

Pelajar yang menerima bantuan khas ini adalah daripada UMS (1,668 orang), Universiti Teknologi Mara (UiTM) Sabah (441 orang), Kolej Teknikal Yayasan Sabah (265 orang) Universiti College Sabah Foundation (104 orang), ATI College (111 orang), Politeknik Kota Kinabalu (563), SIDMA College Sabah (208), Cosmopoint College (70 orang) dan Unitar International Universiti (133 orang).

Universiti lain yang turut menerima ialah Kolej Kiara, Inti College Sabah, Mahsa College Sabah, Asia Metropolitan College Kota Kinabalu, Borth Borneo University College, Kolej Eastern, Almacrest International College, Kinabalu Commercial College dan MSU College Sabah.

Para pelajar yang ditemui pada majlis itu merakamkan ucapan terima kasih kepada kerajaan negeri atas keprihatinan memberikan bantuan khas kewangan kepada mereka.

Wakil pelajar UMS Jusman Nail berkata, dia akan gunakan bantuan khas kewangan itu untuk membeli buku rujukan tambahan.

"Terima kasih kepada kerajaan negeri atas bantuan ini. ia membuktikan kerajaan begitu prihatin terhadap kebajikan dan masalah dari segi kewangan yang sering dihadapi para pelajar.

"Ini sedikit sebanyak dapat membantu meringankan bebanan kami," katanya.

Bagi Raffell Robert pelajar Inti College, bantuan khas kewangan itu amat dialu-alukan untuk membantu pelajar dari keluarga susah.

"Bantuan kewangan ini amat baik untuk meringankan bebanan kewangan para pelajar dari keluarga kurang berkemampuan dan tanda keprihatinan kerajaan negeri kepada semua lapisan masyarakat terutamanya pelajar," katanya.